

KENYATAAN MEDIA

YBR SEDIAKAN RM3.1 JUTA BAGI BANTUAN AWAL PENGAJIAN

Kuala Lumpur, 9 Disember 2020 – Yayasan Bank Rakyat menyediakan RM3.1 juta sebagai bantuan awal pengajian kepada pelajar yang ingin menyambung pengajian ke peringkat lebih tinggi.

Program ini telah mendapat kerjasama semua Institusi Pengajian Tinggi Awam (IPTA) yang terpilih dimana bantuan itu diberikan kepada pelajar dikalangan keluarga berpendapatan B40 untuk menyambung pengajian di peringkat diploma dan ijazah.

Prihatin dengan kekangan yang dihadapi oleh pelajar universiti, satu sesi Penyerahan Bantuan Awal Pengajian telah disempurnakan oleh Menteri Pembangunan Usahawan dan Koperasi (MEDAC) YB. Dato Sri Dr. Hj Wan Junaidi Bin Tuanku Jaafar di Menara Kembar Bank Rakyat. Turut serta hadir adalah Datuk Seri Dr. Noraini Ahmad, Menteri Pengajian Tinggi serta wakil dari 12 universiti terpilih iaitu UUM, UniMAP, USM, UPSI, UPM, UKM, UTEM, UTM, UMP, UMK, Unisza & UiTM.

Menteri Pembangunan Usahawan Dan Koperasi, Dato Sri Dr. Haji Wan Junaidi Tuanku Jaafar berkata, inisiatif ini sejajar dengan aspirasi kerajaan untuk membangunkan dan melahirkan lebih ramai modal insan di negara ini bagi sektor tenaga mahir dan profesional tempatan serta meningkatkan pendapatan rakyat.

Pelajar yang mempunyai peluang untuk mendapat pendidikan secara tidak langsung juga akan berpotensi untuk menjadi usahawan dan boleh mendapatkan bantuan dan khidmat nasihat di agensi-agensi di bawah MEDAC untuk memulakan perniagaan.

Tambah beliau lagi, pelajar yang mendapat bantuan awal ini tidak perlu membayar balik jumlah yang diterima dan boleh menggunakan wang tersebut bagi tujuan memulakan pengajian sementara menunggu mendapat tajaan atau bantuan kewangan yang lain.

Pengerusi Yayasan Bank Rakyat, Datuk Nazir Hussin Akhtar Hussin turut berkata, bantuan awal pengajian ini adalah salah satu inisiatif bagi membantu pelajar baru seiring dengan objektif yayasan dalam membantu meningkatkan tahap sosio ekonomi melalui pendidikan.

Beliau menambah, bantuan sebanyak RM1,000 sebagai permulaan akan diberikan secara 'one-off' dan dijangka memanfaatkan lebih 3,100 pelajar baru yang ingin melanjutkan pengajian mereka.

Diharapkan usaha ini dapat diteruskan dan membantu lebih ramai lagi pelajar yang memerlukan serta secara tidak langsung memberi semangat kepada mereka untuk menyambung pelajaran ke peringkat lebih tinggi bagi meningkatkan taraf ekonomi yang lebih baik.

KEMENTERIAN PEMBANGUNAN USAHAWAN DAN KOPERASI